

1 Yohanis

Hakerek dala uluk nosi Yohanis

Yohanis nakerek nosi Yesus Kristus

¹ Ha'u kakerek ne'e kosi *Maromak Manfatin mak Foo Moris*.

Baa oras lale'an no raiklaran sei la iha dauk, *Manfatin* ne'e iha kedan ti'an. Uluk, Nia nein no Niakaan Ama iha lale'an, mais oras ne'e ha'u ko ha'ukaan mamaluk sia haree Nia hodi matan du'uk ti'an. Ami rona Nia hodi tilun du'uk ti'an. Ami moos kaer Nia hodi liman du'uk ti'an. Ami bele nunia,^{☆ 2} tan Nia natadu aan iha amikaan klaran. Tan baa nia, ami la hata'uk katak lia nosi Nia, hodi halore dalam nebee ema raiklaran bele netan moris to'o nima-nimak. Tan Nia ne'e, *Manfatin mak Foo Moris*.^{☆ 3} Ami hakara foo hatene baa emi lia hotu-hotu mak ami haree no rona ti'an, nebee emi bele neon ida ho ami, tan ita hotu-hotu talin malu ho Na'i Maromak no Niakaan Oan, Yesus Kristus. ⁴ Ami solok hakerek ne'e baa emi, nebee emi bele neon boot. Hodi nunia, amikaan neon moos hetak boot.

Moris iha kroman

⁵ Baa oras ami sei hamutuk ho Yesus, Nia nanorin ami. Oras ne'e, ami moos hato'o hanorin nia baa emi nune'e: Na'i Maromak di'ak kaliuk. Nia la noo aat kois. Nia hanesan kroman mak naksinak, la nakukun kois. ⁶ Kalo ita dale ha'ak, "Ita moris neon mesak ho Na'i Maromak," mais ita sei halo lia aat, ne'e na'ak, ita moris

iha makukun laran. Ita dale tolek, no ita la moris tuir dalam mak loos. ⁷ Mais kalo ita moris tuir dalam loos, ne'e na'ak, ita moris iha Na'i Maromak kroman. Hodi nunia, ita bele moris neon ida, laran ida. Itakaan neon dadi moos, tan oras Na'i Maromak Oan Yesus mate, Nia nodi raan kasu mohu itakaan salan hotu-hotu.

Emak mak moris iha kroman, la nalo sala

⁸ Kalo ita dale ha'ak, "Ita la hoo sala," ne'e na'ak, ita tolek aan no la hatene hanorin loos. ⁹ Mais Na'i Maromak neon loos. Kalo ita ha'ak hasai itakaan salan, Nia nanis nala'o Niakaan mamenon nodi kasu mohu itakaan salan, no namoos itakaan neon. ¹⁰ Kalo ita dale ha'ak, "Ita la halo sala," ne'e na'ak, ita halo Na'i Maromak baa maktolek teen, tan Nia katak ti'an na'ak, ema hotu-hotu nalo sala. Kalo ita dale nunia, ne'e moos na'ak, Maromak Manfatin la nahabut iha itakaan neon.

2

¹ Oa sia! Ha'u kakerek lia ne'e sia baa emi, nebee emi moris la halo sala ona. Mais kalo noo ema ida nalo sala, ita hoo maktulun ida mak naloos ita iha Ama Maromak oin. Maktulun nia, mak Yesus Kristus. Nia, Ema Moon mak Na'i Maromak solok mai ti'an iha raiklaran ne'e. ² Nia mate bodik selu nola ita, nebee Na'i Maromak kasu mohu itakaan salan. Nia lahoos mate bodik ita mesan dei, mais bodik ema hotu-hotu iha raiklaran ne'e.

Emak mak moris iha kroman, hadomi malu

³ Ita hatene ita kre'is ho Na'i Maromak kalo ita tuir Niakaan ukun. ⁴ Kalo ema ida dale na'ak, "Ha'u kre'is ko Na'i Maromak," mais ema

nia la nalo tuir Na'i Maromak ukun, ne'e na'ak, ema nia maktolek teen. ⁵ Mais kalo ita halo tuir Na'i Maromak ukun, ne'e na'ak, itakaan dadomin baa Nia tetuk ti'an. Hodi nunia, ita bele hatene, ita ne'e Na'i Maromak eman. ⁶ Kalo ema ida dale na'ak, "Ha'u ktalin malu ko Na'i Maromak," niakaan moris lala'ok musti hanesan Yesus Kristus.

⁷ Maluk sia mak ha'u kadomi! Ukun mak ha'u kakerek ne'e, ukun hadomi malu. Ukun ne'e lahoos ukun foun bodik emi, tan emi hala'ok ukun ne'e ti'an nahuu hori emi simu Maromak Manfatin.✧ ⁸ Masik nunia moos, kakerek lia foun tenik kosi ukun ne'e, tan ukun ne'e la'o nima-nimak ti'an iha Yesus Niakaan moris. Ukun ne'e moos la'o nima-nimak ti'an iha emikaan moris, to'o makukun nahuu lakon iha emikaan neon laran, no kroman nahuu naksinak ona.

⁹ Kalo ema ida dale na'ak, "Ha'u kmoris iha kroman," mais ema nia hirus niakaan maluk, ne'e na'ak, ema nia sei moris iha makukun, ¹⁰ tan ema mak moris iha kroman, nia nadomi niakaan maluk, no la noo lia aat sa-saa iha neon mak nahonu nia. ¹¹ Dadi kalo ema hirus niakaan maluk, ne'e na'ak, nia moris iha makukun. Nia la'o lemas dei, tan makukun nadelek matan.

Ema mak moris iha kroman, la moris tuir raiklaran beer

¹² Oa mak foin fiar sia! Ha'u kakerek ne'e bodik emi,
tan Kristus mate ti'an bodik emi,
nebee Na'i Maromak kasu mohu emikaan salan.

¹³ Ema matas mak fiar oras ti'an sia! Ha'u kakerek ne'e bodik emi,

✧ 2:7 Yohanis 13:34

tan emi kre'is baa Yesus Kristus,
mak iha kedan hori uluk aan.
Ema nurak mak fiar biit sia! Ha'u kakerek ne'e
bodik emi,
tan emi sakar a'aat huun,
to'o hatoba hola.

¹⁴ Oa mak foin fiar sia! Ha'u kakerek ne'e bodik
emi,

tan emi kre'is baa Ama Maromak.
Ema matas mak fiar oras ti'an sia! Ha'u kakerek
ne'e bodik emi,
tan emi kre'is baa Yesus Kristus,
mak iha kedan hori uluk aan.

Ema nurak mak fiar biit sia! Ha'u kakerek ne'e
bodik emi,
tan emi rai Maromak Manfatin iha neon
laran,
to'o emi dadi biit,
hodi sakar a'aat huun,
to'o hatoba hola.

¹⁵ Keta tuir raiklaran beer. Keta buka raiklaran
sasoin. Tan ema mak nadomi raiklaran, nia la
nadomi Ama Maromak. ¹⁶ Raiklaran fafurak sia,
hanesan moris nadi'ak aan, rotus teen, no loko
aan tan soi, lia ne'e sia mai nosi raiklaran, la mai
nosi Ama Maromak. ¹⁷ Nosi ikus, raiklaran atu
lakon mohu bele-bele no fafurak hotu-hotu mak
ema no'i buka-buka nia. Mais ema mak nalo
tuir Na'i Maromak beer, nia atu netan moris to'o
nima-nimak.

*Ema mak moris iha kroman, daka aan nebee
keta kona be'ur*

¹⁸ Oa sia! Loron rai falu fila kre'is mai ona.
Emi rona ti'an ha'ak, kre'is rai falu fila, ema mak
sakar Kristus atu mosu mai. Oras ne'e sia mosu
ti'an, tan noo ema wa'in mak sakar Kristus iha
nabee dei. Lia ne'e dadi tadak na'ak, loron rai

falu fila kre'is mai ona. ¹⁹ Maksakar nia sia mai nosi itakaan klaran. Mais sia lahoos itakaan ema. Kalo sia tebe-tebes itakaan ema, sia la la'o nela ita. Mais tan sia la'o nela ita, malorek ti'an, sia lahoos itakaan ema.

²⁰ Mais emi oin seluk hosi sia. Emi simu ti'an Na'i Maromak Kmalar Lulik. Nia babilan emi, to'o emi hatene hanorin loos hotu-hotu. ²¹ Ha'u kakerek ne'e lahoos tan emi la hatene lia loos. Lale! Emi hatene ti'an. Emi hatene lia nabee mak loos, no nabee mak la loos.

²² Mais oras ne'e, noo ema manorik kale'uk wa'in la'o lema raiklaran ne'e. Oin nunabee ita bele hatene sia? Ita bele hatene sia, tan sia dale na'ak, Yesus lahoos Kristus. Sia moos sakar Ama Maromak no Oan. ²³ Kalo ema ida dudu sees Ama Maromak Oan, ema nia la talin malu no Ama Maromak. Mais kalo ema ida simu Ama Maromak Oan, ema nia talin malu no Ama Maromak.

²⁴ Kaer metin hanorin mak emi rona hori uluk nia, nebee emi talin malu nohuun ho Ama Maromak no Oan. ²⁵ Tan Nia nameno ti'an na'ak, ita atu moris nima-nimak ho Nia.

²⁶ Ha'u kakerek ne'e, nebee emi bele hatene kedan nosi ema manorik kale'uk sia mak nakara be'ur emi. ²⁷ Emi simu ti'an Na'i Maromak Kmalar Lulik. Emi moos talin malu nohuun ho Nia. Tan lia nia, emi lalika buka tenik ema seluk atu nanorin emi. Kmalar Lulik dei to'o ti'an, tan Nia bele nanorin lia loos hotu-hotu. Nia la kale'uk nu'u manorik kale'uk nia sia. Dadi kaer metin Niakaan hanorin, nebee emi bele talin malu nohuun ho Kristus.

²⁸ Nune'e, oa sia! Emi musti talin malu ho Kristus, nebee oras Nia namaan aan mai nikar, emi la moe aan, mais emi bele haberan aan

hariik iha Niakaan oin. ²⁹ Emi hatene Kristus nalo lia loos nohuun tuir Na'i Maromak hakaran. Tan lia nia, emi moos bele hatene ha'ak, ema mak nala'ok lia loos tuir Na'i Maromak hakaran, sia mak dadi baa Niakaan oan.

3

Ita dadi baa Na'i Maromak oan sia

Na'i Maromak oan sia moris la nalo sala

¹ Hanoin kokon itakaan Aman dadomin baa ita! Dadomin nia, maka'as kaliuk, to'o Nia foti ita baa Niakaan oan. Tebes! Mais ema mak moris tuir raiklaran beer, sia la natene ita ne'e see, tan sia la natene itakaan Ama.✧

² Mamaluk sia mak ha'u kadomi! Ita dadi Na'i Maromak oan ti'an, mais sei la malorek dauk ita atu dadi oin nu'u saa tenik. Lia mak ita hatene nune'e: Oras rai falu fila Kristus namaan aan mai nikar, ita atu dadi hanesan Nia, tan oras nia, foin ita haree malorek Nia. ³ Ema hotu-hotu mak naloon baa Niakaan mamain nia, sia musti namoos aan, nebee bele moris moos hanesan Nia. ⁴ Mais ema mak nalo sala, sia nakur Na'i Maromak ukun, tan sala hotu-hotu sakar Na'i Maromak ukun. ⁵ Emi hatene ti'an ha'ak, Kristus mai raiklaran ne'e atu kasu mohu itakaan salan. Nia du'uk la noo sala.✧ ⁶ Tan baa nia, ema mak talin malu no Kristus, la nalo sala ona. No ema mak nalo sala, nia la natene Kristus.

⁷ Oa sia! Keta kona be'ur tan lia ne'e. Ema mak moris loos nalo hahalok loos, tan nia neon loos hanesan Kristus. ⁸ Mais ema mak nalo sala, nia talin malu no diabu ulun mak nalo hahalok aat

hori uluk. Tan baa nia, Na'i Maromak Oan mai atu nadodok diabu ulun hahalok aat nia sia.

⁹ Kalo ema ida dadi baa Na'i Maromak oan, ema nia moris la nalo sala ona, tan Na'i Maromak moris ti'an iha niakaan neon. Nia la bele nalo sala ona, tan nia simu moris foun ti'an nosi Na'i Maromak. ¹⁰ Hodi nunia, ita bele hatene, see mak talin malu no Na'i Maromak, no see mak talin malu no diabu ulun. Tan ema mak la nalo hahalok loos, no la natene nadomi maluk, ema nia sia lahoos Na'i Maromak eman.

Na'i Maromak oan sia moris nadomi malu

¹¹ Hori uluk emi rona ti'an hanorin na'ak, "Ita musti hadomi malu!"[☆] ¹² Tebes. Hanoin baa lia Kain no Habel. Keta tuir Kain, tan nia talin malu no diabu ulun mak a'aat huun, to'o nia no'o nikar alin Habel. Tan saa Kain nalo nunia? Tan niakaan hahalok aat, mais alin Habel niakaan hahalok loos.[☆] ¹³ Tebes, mamaluk sia. Dadi keta blaar kalo ema mak tuir raiklaran beer, hirus emi.

¹⁴ Kalo ita hadomi itakaan mamaluk, ita bele hatene kedan ha'ak, ita atu hetan moris nima-nimak ho Na'i Maromak. Mais kalo ita la hadomi itakaan mamaluk, ita la hetan moris ho Na'i Maromak.[☆] ¹⁵ Ema mak hirus niakaan mamaluk, Na'i Maromak sura nia hanesan ema mak no'o ema. Emi hatene ti'an ema oin nunia la netan moris nima-nimak no Na'i Maromak. ¹⁶ Ita hatene dadomin mak loos, hosi Kristus dadomin. Nia nadomi ita, to'o latan niakaan moris nodi sori ita. Tan lia nia, ita moos musti latan itakaan moris hodi tulun mamaluk. ¹⁷ Kalo ema ida moris furak, mais neon la monu baa mamaluk

☆ **3:11** Yohanis 13:34 ☆ **3:12** Lia Uluk Fohon 4:8 ☆ **3:14** Yohanis 5:24

susar sia, nunabee nia bele dale na'ak, “Ha'u kadomi Na'i Maromak!” La bele!

¹⁸ Oa sia! Keta hadomi hodi ibun dei, mais hadomi hodi hahalok di'ak. Tan hodi nunia, foin ita hatudu dadomin mak loos. ¹⁹ Kalo ita moris hodi hadomi nunia, ita bele hatene ha'ak, ita moris tuir hanorin loos. Hodi nunia, itakaan neon lalika hata'uk oras ita hariik iha Na'i Maromak oin. ²⁰ Tebes! Kalo itakaan neon la noku tan ita sei hanoin sala mak uluk ita halo, ita lalika hata'uk. Itakaan neon bele noku, tan Na'i Maromak natene hotu itakaan moris. Nia dodan ita liu nosi ita du'uk.

²¹ Mamaluk sia mak ha'u kadomi! Kalo itakaan neon la tula sala baa ita ona, ita la hata'uk hariik iha Na'i Maromak oin. ²² Hodi nunia, ita bele simu hotu-hotu mak ita husu baa Nia, tan ita hala'ok Niakaan ukun ti'an, hodi halo lia mak nalo Nia neon di'ak. ²³ Niakaan ukun nia nune'e: Fiar nohuun baa Yesus Kristus, Niakaan Oan mak Nia solok ti'an nia. Hadomi malu nohuun, hanesan Yesus naruka ti'an baa ita. ²⁴ Kalo ita halo tuir ukun nia sia, ne'e na'ak, ita talin malu ho Na'i Maromak. Na'i Maromak moos talin malu no ita. Na'i Maromak moos foo tadak nebee ita bele hatene tebes ha'ak, Nia talin malu no ita, hodi foo Niakaan Kmalar mak moris iha itakaan neon laran.

4

Na'i Maromak oan sia daka aan tan hanorin kale'uk

¹ Mamaluk sia mak ha'u kadomi! Oras ne'e, ema manorik kale'uk wa'in la'o lema raiklaran ne'e. Sia be'ur ema na'ak, sia Maromak mako'an

✧ **3:23** Yohanis 13:34, 15:12, 17

mak nodi mamenon nosi Nia. Mais sintidu! Kalo ema ida dale na'ak, nia nodi lia mamenon nosi Na'i Maromak, keta simu nunia dei. Musti tetu no leno di'a-di'ak atu hatene niakaan dalen nia, mai nosi Na'i Maromak ka, lale. ² Ita bele tetu niakaan dalen nune'e: Na'i Maromak nameno kedan hori uluk atu solok Oan mai raiklaran ne'e. Kalo ema mak nodi mamenon katak na'ak, Yesus Kristus tebe-tebes Na'i Maromak Oan mak dadi ema raiklaran nu'u ita, niakaan mamenon nia nanis mai nosi Na'i Maromak. ³ Kalo ema nia la simu Yesus nunia, niakaan mamenon nia la mai nosi Na'i Maromak, mais mai nosi funu mak sakar Kristus. Emi rona ti'an ha'ak, funu mak sakar Kristus atu mosu mai iha raiklaran. Tuir loos, funu nunia iha ti'an.

⁴ Lia nune'e, oa sia! Emi ne'e, Na'i Maromak eman no Niakaan Kmalar moris iha emikaan neon. Tan Niakaan beran maka'as liu raiklaran beran hotu-hotu, emi bele hatoba hola ema mak sakar Nia. ⁵ Manorik kale'uk sia mai nosi raiklaran. Siakaan dalen tuir raiklaran beer. Etuk, ema mak moris tuir raiklaran beer nakara nanono baa siakaan hanorin kale'uk nia. ⁶ Mais ita ne'e, Na'i Maromak eman. Ema mak talin malu no Na'i Maromak, sia nanono baa ita. Mais ema mak la talin malu no Na'i Maromak, sia la nanono baa ita. Hodi nunia, ita bele hatene lia nabee mak mai nosi hanorin loos huun, no lia nabee mak mai nosi hanorin kale'uk huun.

Dadomin kabaas mak nahabut baa Na'i Maromak

⁷ Mamaluk sia mak ha'u kadomi! Ita musti hadomi malu, tan dadomin mai nosi Na'i Maromak. Ema hotu-hotu mak nadomi malu, sia mak Na'i Maromak oan. Sia moos kre'is no Na'i

Maromak. ⁸ Mais ema mak la nadomi malu, sia la talin malu no Na'i Maromak, tan Nia dadomin huun. ⁹ Na'i Maromak natudu dadomin baa ita nune'e: Nia solok Niakaan Oa Mane mesak mai raiklaran ne'e, atu loke dalam bodik ita, nebee ita bele moris ho Nia to'o nima-nimak. ¹⁰ Tebes! Dadomin kabaas nahabut baa Na'i Maromak. Dadomin kabaas, lahoos itakaan dadomin baa Na'i Maromak, mais Niakaan dadomin baa ita, tan Nia latan Oan mate, dadi baa sera atu selu nola ita. Hodi nunia, Nia kasu mohu itakaan salan, nebee ita bele di'ak hikar ho Nia.

¹¹ Mamaluk sia mak ha'u kadomi! Tan Na'i Maromak nadomi ita liu resik nunia, ita moos musti hadomi malu. ¹² La noo ema ida kois mak naree lo-loren Na'i Maromak. Mais kalo ita hadomi malu, ne'e na'ak, Na'i Maromak namutuk no ita. Niakaan dadomin moos hetak tu'an iha itakaan moris, to'o dadi dadomin kabaas.✧

¹³ Na'i Maromak natuun Niakaan Kmalar baa ita. Tan lia nia, ita bele hatene ita talin malu ho Nia. Nia moos talin malu no ita. ¹⁴ Ha'u ko ha'ukaan maluk sia haree du'uk ti'an Na'i Maromak Oan. Hotu ami katak baa ema hotu-hotu ha'ak, Ama Maromak solok ti'an Oan atu sori ema raiklaran nosi sala. ¹⁵ Ema hotu-hotu mak simu na'ak, Yesus mak Na'i Maromak Oan, sia talin malu no Na'i Maromak. Na'i Maromak moos talin malu no sia. ¹⁶ Ita hatene ha'ak, Na'i Maromak nadomi ita liu resik. Tan lia nia, ita moos bele fiar ha'ak, Nia atu nadomi ita to'o nima-nimak.

Na'i Maromak nadomi ita tebes. Kalo ita hadomi malu, ne'e na'ak, ita talin malu ho Nia. Nia moos talin malu no ita. ¹⁷ Kalo ita talin malu ho Nia nunia, itakaan dadomin dadi

✧ 4:12 Yohanis 1:18

dadomin kabaas. Nosi ikus, baa oras rai falu fila, Na'i Maromak tetu ema hotu-hotu moris, ita lalika hata'uk hariik iha Niakaan oin, tan ita dadi hanesan Kristus ti'an baa oras Nia moris iha raiklaran ne'e. ¹⁸ Kalo ita hadomi malu hodi dadomin kabaas, ita la hata'uk ona, tan ta'uk hotu-hotu iha itakaan neon laran lakon ti'an. Mais ema mak la natene dadomin kabaas, sia noran susar tan nata'uk Na'i Maromak atu kastikar sia.

¹⁹ Ita hadomi malu, tan Na'i Maromak nadomi uluk ita. ²⁰ Kalo ema ida dale na'ak, "Ha'u kadomi Na'i Maromak," mais ema nia sei hirus maluk, nia dale tolek. Kalo ema la nadomi maluk mak iha oin du'uk, oin nunabee nia bele nadomi Na'i Maromak mak nia sei la naree dauk? La bele! ²¹ Na'i Maromak du'uk natuun ukun na'ak, ita keta hadomi Nia dei, mais ita moos musti hadomi mamaluk.

5

¹ Ema hotu-hotu mak fiar na'ak, Yesus mak Kristus, sia dadi baa Na'i Maromak oan. Hanoin! Ema mak nadomi ama ida, ema nia nanis nadomi no ama nia niakaan oan sia. ² Kalo ita hadomi Na'i Maromak hodi halo tuir Niakaan ukun, ne'e na'ak, ita moos hadomi Niakaan oan sia. ³ Kalo ita hadomi Na'i Maromak, ita halo tuir Niakaan ukun. Mais Niakaan ukun la todan.✧ ⁴ Ita mak dadi Na'i Maromak oan, bele hatoba beran aat raiklaran hotu-hotu, tan ita fiar baa Nia. ⁵ See mak bele natoba beran aat raiklaran hotu-hotu nia? Nanis ema mak fiar na'ak, Yesus mak Na'i Maromak Oan.

Yesus tebe-tebes Kristus, Na'i Maromak Oan

✧ 5:3 Yohanis 14:15

⁶ Yesus tebe-tebes Kristus, Na'i Maromak Oan mak Nia solok mai iha raiklaran ne'e. Baa oras Yesus atu nala'o Niakaan serwisu, Yohanis sarani Nia nodi wee. Nosi ikus, Nia mate nodi naduar raan. Hodi nunia, ita hatene malorek ha'ak Yesus ne'e, tebe-tebes Kristus. Lahoos ita hatene tan wee dei, mais ita moos hatene tan raan nia. Na'i Maromak Kmalar moos natebes nunia. No Na'i Maromak Kmalar nia, hanorin loos huun.

⁷ Noo lia tolu mak natebes na'ak, Yesus tebe-tebes Kristus.* ⁸ Ida, Na'i Maromak Kmalar Lulik du'uk. Rua, wee mak Yohanis nodi sarani Yesus. Tolu, Yesus raan mak nakduar. Lia boot tolu nia, natudu lia mesak nosi Yesus na'ak, Nia tebe-tebes Kristus. ⁹ Kalo ita bele simu ema raiklaran dalen, saa tenik baa Na'i Maromak dalen. Nia nodi lia boot tolu nia atu katak na'ak, Yesus tebe-tebes Kristus, Niakaan Oan mak Nia solok mai ti'an iha raiklaran ne'e. ¹⁰ Kalo ema ida fiar baa Na'i Maromak Oan, ne'e na'ak, nia simu ti'an saa mak Na'i Maromak dale nosi Oan nia. Mais ema mak la fiar, ema nia nalo Na'i Maromak baa maktolek teen, tan nia la simu saa mak Na'i Maromak dale du'uk nosi Niakaan Oan na'ak, ¹¹ ema bele hetan moris loos to'o nima-nimak, surak fiar baa Oan.✧

¹² Ema mak talin malu no Na'i Maromak Oan, sia atu netan moris nia. Mais ema mak la talin malu no Na'i Maromak Oan, sia la netan.

* **5:7** Iha Hakerek Moon lia seluk noo hakerek tu'an na'ak, ["(7b) lia tolu mak natabes iha lale'an, ne'e mak Ama, Manfatin, no Kmalar Lulik. Sia na'in tolu nia, mesak ida. (8a) Noo lia tolu mak natebes iha raiklaran,"]. Tuir loos, lia fuan ne'e sia la noo iha Hakerek Moon lia Yunani tuan kaliuk. Lia fuan nia sia mosu tu'an iha Hakerek Moon nahuu hori tinan rihun ida atus tolu.

✧ **5:11** Yohanis 3:36

Tan saa Yohanis nakerek hakerek ne'e?

¹³ Ha'u kakerek lia ne'e sia bodik emi mak fiar baa Na'i Maromak Oan, nebee emi bele hatene, emi atu hetan moris to'o nima-nimak.

Yohanis nakerek tu'an nosi lia hamulak

¹⁴ Ita bele haberan aan hamulak baa Na'i Maromak, tan ita hatene, kalo ita hamulak hodi husu sa-saa tuir Niakaan hakaran, Nia nanis rona. ¹⁵ Tan ita hatene Nia nanis rona saa mak ita husu, ita moos bele hatene, ita nanis simu saa mak ita husu nia.

¹⁶ Kalo emi haree maluk ida nalo sala, di'ak liu, hamulak hodi husu nebee Na'i Maromak tulun nia netan moris. Ha'u kdale ne'e, nosi sala mak la nodi ema baa mate. Mais noo sala seluk mak nodi ema baa mate. Ha'u la karuka emi hamulak, kalo noo sala oin nunia. ¹⁷ Lia la di'ak hotu-hotu mak ema nalo, Na'i Maromak sura nalo baa sala. Mais lahoos sala hotu-hotu mak nodi ema baa mate.

Yohanis nakerek tenik nosi lia mak noo folin

¹⁸ Ema mak talin malu no Na'i Maromak moris la nalo sala ona, tan Na'i Maromak Oan daka sia. Diabu ulun mak a'aat huun moos la bele natoba nola sia.

¹⁹ Ita hatene, ita ne'e talin malu ho Na'i Maromak. Mais ita moos hatene, diabu ulun mak a'aat huun noo beran atu babilan ema hotu-hotu iha raiklaran.

²⁰ Ita hatene, Na'i Maromak Oan mai atu nakroma itakaan neon, nebee ita bele hatene Maromak mak loos. Oras ne'e ita bele kre'is ho Nia, tan ita kre'is ho Oan, Yesus Kristus. Yesus Kristus moos Maromak mak loos. Nia mak foo moris nima-nimak baa ita.

²¹ Oa sia! Daka di'a-di'ak emikaan moris. Keta to'o emi hana'i baa lia kale'uk mak seluk Na'i Maromak iha emikaan neon.
Nunia dei.
Yohanis

Tetun Alkitab
Genesis and the New Testament in the Tetun Belu
language of Indonesia and East Timor
Kejadian dan Perjanjian Baru dalam bahasa Tetun
Belu. Genesis eo Novo Testamento em língua Tétum
Belu.

copyright © 2013 Unit Bahasa dan Budaya

Language: Tutun Belu (Tetun)

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 9 Oct 2020

66336204-8208-5358-97ab-2b85b8c3392e